

PRESS RELEASE

(No.7/2015 - Dt.7/10/2015)

EAST MARALAND SIEPAHLIENA LÂPI TAO VÂTA LÔBÔ TA CEM PUHPA RT. ZACHÔNÔ RÔHNAH KAWPA TA PALYUPALIH



Târi 5th, Hriatuanoh liana khata Lôbô khih liata MADC CEM Puhpa RT. Zachônô cha palyupalihna asâhchaipa chhao ta Siku hawhti nata NGO zydua hleikhôta VC nôpawpa nata khihtlâh nôpawpazy ta Gate angia ngaitapa taopa ta rôhnah kawpa ta vaw y dy ei ta, hmosaipiepa Pawpi nata Mara poh angia kawpa ama vaw hlâ.

Lôbô nata Tlyrâh likawh Lâpi, sao chhôhta su thokha arao hapazy cha MADC ta a taopathi hleikhôta Beinô ti alai kawpa vâta niebaw nata nohto peimawhpa supply-na awpa ta Beinô chavah liata Baly(Speed Boat) a sopa cha Lôbô zawpi ta aly kaw ei ta, he hawhta palyupalih-na he ama hneipa a châ.

Puhpa RT. Zachônô nata a lahpînô Pihnô S. Sari zy cha MTP zy ta dyna gate tawhta VC-II Court House taihta amâ sy.

Hriatuanoh 1:30PM pata Lôbô kaw tlô ei ta, 2:30Pm - 4PM taihta Khisawzy nata apakyh-pakhyna - Public Meeting hneipa châ ta, he liata Puhpa RT. Zachônô, CEM, Puhpa LC. Châkhai, Chairman nata biatuhpa Puhpa MH. Tiabi, EM(PWD) zy ta bie reina ama hnei.

Puhpa RT. Zachônô biereipa thokhazy:

1. Lôbô he khitlyna Lâpi a châ vâta chapia tyh na ta, anodeikua CEM ei châ tawhta a khih target pa ta ei kaw tlypa a eikhana a châ.
2. Chhin State khihpi Hiakha pangaina lathlôh arao hapa vâta pachhana rai hria abyuh ha ta, Lôbô - Tlyrah lâpi he mohôh-na rai eima hriapa a châ.
3. Baly(Speed Boat) he chalei eima chhuah lei tarawpa ta eima unawh penawhzy ama rairunazy pahnokhei pi ta, chahruh abyuhpa vâta phusa rairu kawna chôta eima chaleipa a châ.
4. He Lâpi mo awpa nata Baly zy mo awpa hleikhôta VC nata khihtlâh nopawpazy ta Lôbô tly awpa ta eina hrua vâ ei ta ei ly kaw.
5. Keima nata ei kaolâhpa/lahpinô, eima pano lâh ta maniah namâ sy vâta arônah eitah kaw. Keima nâ sy leipa ei chi ta, Marapa râh CEM namâ sypa a châ tahpa ei rei khoh kaw.
6. CEM he amoh deita ta châ na ta, Executive Committee bie pathlupa bie hawhta, eima zydua pahnopa ta rai ahriapa ei châ.

7. He Sawhkhâna he Party hropazy liata ahriapazy nah tah â eih-khyhna y leipa ta a sie lymâ vâta ei ly kaw.

8. Sixth Scheduled Amendment hlaio patloh ta, palaiseihsa via laih lymâ awpa he Congress Party zy eima vision a châ. Election chy dei ta areih tyhpa hawhta kyhchhie maniah reih tyh ei ta, anodeikua eima hmô hlâ via cha eima hiah pazi lymâ aw. Atahmâ he hlaotloh awpa duahmo liata aduah pita, "Central Sawhkhâ ta bieheina lai viapa pie awpa apachhuah vâta châ ta, Congress hmah lana vâ châvei" tahpata areihpa ama y tyhpa a lyu kaw. He kyh liata asohsipa ta, chhie nata pha, hmo dopa nata hmo deo leipa eima pathlua thai awpa abyuh kaw.

9. Bieheina lai viapa eima hmô tita cha India Mara dei châ leipa ta, Khizaw, su hro lâ liata Marasaw a ypazy he pachâ peimawh awpa palôhru eima hnei. Khazohpa ta Marapa châ awpa ta maniah tao ha ta, chavâta Marasaw zy hnoh ta Marapa châna chi tu lymâ pa ta, Marapa palôhrupa pahneisa awpa he eima palôh lia alai kaw.

10. Nochhi râh lâ liata Maraland padua awpa kyh liata tha patlô lymâ awpa he khoh kaw pita, eimâ chhuah hra.

11. Zôphei he Marapa ama châ. Keima nata ei hrialâhpazy pi ta Marapa pachâna he pakawh lymâ khoh pi ta, byhnâ eima topa zydua he ahmâna dâh thai awpa eima khoh kaw.

12. "Eima phana rakha tawhna he ta hmialâ sie suh u" tahpa Bible bie hawhta "Better Maraland" tao awpa he Marasawzy pi ta eimâ chhuah chy awpa apha kaw.

13. Meikâpa nata râhmâhpa pabohsa lymâ awpa he eima mopakha chy maohphaoh-na a châ.

14. Chapi nata Pala hleikhôta Lôbô he khih pathaihpâ a châ tahpa ta eima vaw pahnopa châ ta, ei ly ngaita kaw. Pathaihna kyh he pachâpeimawhpa ta tiama papua via lymâ suh u.

15. Khitlâh châ nata Sawhkhâ châta ngâ achhih awpa ta mopakha chy liata â pahnie. Chavâta râh reserve taopa he apha kaw; dâh parao lei awpa ta eimâ chhuah chy awpa a châ.

16. Beinô liata Nga a ypa pabohsa awpa ta MTP nata VC zy hmah lapa ta duty namâ raopa he apha tah kaw na ta, tao pazao lymâ awpa ta ei cha khokhei kaw ei.

17. Râh â bohpa ta achâ khia Pazu Pavaw zy vaw hlüh via lymâ aw ta, eima pahrâna Mararâh chhao ngiaryh â vaw chhih via lymâ aw.

18. Khizaw he Global Village na a châ habâ ama tahna yzie lymâ hawhta khatita ma cha khizaw su nano nanopa tawhta Mararâh sai awpa ta ama vaw tlôh laih lymâ hra aw. Cha tita ngiaryh achhihpa Mararâh châ awpa ta atahmâno tawhta hma lapa ta ngiaryhchhih kawpa ta tao awpa he mopakha chy eima maohphaoh-na a châ.

19. Azâkô lâ liata Lôbô khihpi ta Âhia chhei ei chi ta, nama hlaio atloh kaw tahpa ei vaw pahno. He tawh chhao ta Job Card rai hria awpa, NLUP avaw hmô awpa nata NLUP ahmô chiehpâ, baona ala khai mâh leipazy ei chi ta, baona ta âchhuana zie lymâ hawhta nietluana pitlohpa taih châta nama hmâ chy awpa ta châ haw ei na ta, khokheina ei cha hlâ ei.

CEM ta biereina ahnei khai tawhta Puhpa LC. Châkhai, Chairman nata biatuhpa Puhpa MH. Tiabi, EM(PWD) zy ta bie reina chyupa ama hnei pazaoh hra.

Public Meeting hnei khai tawhta palyupalih-na kyhchhina liata he meeting ahlaopa zydua chhaota zâ pati dôh khaihpâ a châ. Kyhchhina châta vao sôsaripa ama thie.

CEM he Puhpa LC. Châkhai, Chairman, MADC nata a lahpinô, Biatuhpa MDC Pu MH. Tiabi, EM(i/c PWD) nata a lahpinô, Puhpa F. Hbranchunga, Dy. Chief Whip nata Puhpa C. Khaitha, MDC zy ta ama kaw zi.

Party lâ tawhta Puhpa LC. Rôlua, Secretary, MDCC, Satlia John K. Rema, Secretary, MDYCC zy kaw zi ei ta, Media lâ tawhta Puhpa B. Dawphô, Editor, The time of Maraland nata Puhpa Lalramnghaka Chinzah, Kawl Eng Editor zy ta ama kaw zi.

MADC Official lâ tawhta Puhpa JH. Beihnai, DCAEO, Puhpa BeiRôkhu Beitâ, AITO, Puhpa C. Mochônô, Librarian zy ta kaw zi ei ta, Information Department tawhta Puhpa T. Pabua nata K. Beimokhai zyta ama kaw zi hra.

ISSUED BY INFORMATION & PUBLICITY DEPARTMENT, MADC, SIAHA. COPY-200